

**Kabke Ua Tshoob
Thiab
Kev Plojtuag**

THAWJ TSAVXWM COV LUS NQUAHU

Peb cov Hmoob uas nyob Lostsuas teb thiab cov uas khiav tuaj nyob tebchaws Amelikas no twb pib ntseeg Vajtswv txij xyoo 1950 los lawm. Txawm li ntawd los tseem tshuav ob yam kabke uas peb coobleej tseem tso tsis taus tseg, xwvli tshoobko thiab ntees tuag. Thaum txog ob lub samthawj no cov Hmoob uas twb ntseeg Vajtswv lawm tseem koj raws nraim li tus uas tsis tau ntseeg Vajtswv. Qhov teebmeem yog li no:

1. Tus ntseeg Vajtswv uas muaj tshoobko lossis ntsib kev plojtuag ntawd yog tus uas kev ntseeg tsis tau khov pistsawg. Thaum ntsib ob lub samthawj zoo li hais no nws txawm rovqab mus hu cov kwvtij uas tsis ntseeg Vajtswv tuaj nrog nres. Thaum lawv tuaj nrog nres lawv thiab yuam kom ua Hmoob txoj kabke qub uas ibtxwm ua los. Hmoob tej kabke ntawd feem ntau yeej cuamtshuam Vajluskub xwb. Tus ntseeg zoo li no nws ua ob lub neej nyob ob lub ntuj.
2. Pawg ntseeg ua tsis muaj tus txawj lossis tsis muaj tus xav pab tus tswvcuab uas muaj tshoobko lossis ntsib kev plojtuag. Thaum txog ob lub samthawj no cov thawjcoj hauv pawg ntseeg tseem hais rau tus tswvcuab ntawd hais tias, “Tav nov, tshoobko (lossis kev txomnyem) los txog koj lawm. Ua li koj cov kwvtij ne yog cov twg?” Twb tsimnyog cov thawjcoj hauv pawg ntseeg sawv nres nroos nrog tus tswvcuab ntawd leg rooj tshoob lossis lub ntees tuag kom rawsli cov ntseeg kev sib hlub, tiamsis lawv tseem muab tes haujlwm ntawd pov rovqab rau tus tswvcuab ntawd cov kwvtij. Yog cov kwvtij ntseeg Vajtswv ces kuj tsis muaj teebmeem dabtsi, tiamsis yog lawv tsis tau ntseeg Vajtswv ces lawv yuav ua tej kabke raws nraim li tus tsis ntseeg ua.
3. Tus tswvcuab uas muaj tshoobko lossis ntsib kev plojtuag ntawd yeej yog tus nyiam txoj qub kevcai. Thaum muaj tej xwmtxheej no nws yog tus yeem mus hu cov kwvtij uas tsis ntseeg tuaj nres thiab zoo siab hlo tso rau lawv koj rawsli Hmoob tej qub kevcai uas cuamtshuam Vajluskub. Thaum nug hais tias yog ua cas nws ua li ntawd ces nws teb tias, “Yog tsis ua li cov kwvtij hais ces lawv cem yus heev.” Tiamsis qhov tseeb nws twb yog tus nyiam tej qub kabke ntawd.

Vajtswv txojlus qhia hais tias peb cov uas ntseeg Vajtswv lawm tsis txhob ua lub neej li neeg ntiajteb ntxiv lawm, tiamsis peb yuavtsum hloov dua tshiab (Loos 12:1). Twb yog peb tsis xav ua txoj qub kevcai peb thiab los ntseeg Vajtswv. Yog ua cas peb tseem cia tus ub tus no yuam peb rov mus koj tej qub kevcai ntawd? Yog tej ntawd tseem zoo thiab peb tseem nyiam, yog ua cas peb ho los ntseeg Yexus? Vajluskub hais tias koj yuav haus Vajtswv lub khob thiab dab lub khob tsis tau, thiab koj yuav noj saum Vajtswv lub rooj thiab dab lub rooj tsis tau (1 Kauleethaus 10:21). Peb taug txoj twg lawm yuav tau taug txoj ntawd xwb. Yog ua cas peb tseem ntshai cov kwvtij uas tsis ntseeg cem thiab thuum? Tswv Yexus hais tias yog leejtwg tsis kwv nws tus ntoo dajteg nrog Yexus mus tus ntawd tsis yog Yexus li thwjtij (Lukas 14:27). Ntoos dajteg yog qhov uas raug luag cem luag thuum thiab raug luag tsimtxom ntag. Tus uas yog Yexus li thwjtij tiag yuavtsum tiv tej kev luag cem luag thuum no.

Vim li ntawd HKM thiab pom zoo tsa ib pab kavxwm los kho phau kabke rau tshoobko thiab kev ploj tuag no thiab muab luam rau cov ntseeg sawvdaws tau siv. Txawm nws tsis yog kevcai lijchoj los nws yog ib txoj kabke rau cov ntseeg siv. Kuv thov nquahu kom txhua tus uas yog tswvcuab rau peb HKM thiab rau hauv Cov Ntseeg Yexus thiab Kev Koomtes Qhia Txojmoo Zoo (The Christian and Missionary Alliance) yuavtsum koj thiab ua rawsli phau kabke no. Yog leejtwg tsis yuav lus thiab tseem pheej koj rawsli Hmoob tej kabke qub uas cuamtshuam Vajluskub, kuv thov nquahu rau txhua pawg ntseeg kom txhob txib thiab xaiv tus ntawd los ua thawj koj saib cov ntseeg ntxiv lawm rauqhov nws tsis muaj tus coojpwm zoo li Vajluskub hais hauv 1 Timautes 3.

Thov Vajtswv koj thiab nrog txhua pawg ntseeg thiab txhua tus tswvcuab kom koj tau rawsli phau kabke no.

Vajtswv Haujlwm,

Dr. Timothy Txawj Teev Vaj
Thawj Tsavxwm rau HKM

KAVXWM COV LUS COJ

Peb Hauvpaus Koomhaum Hmoob (HKM) txojkev ntshaw yog kom peb cov Ntseeg Yexus muaj kabke zoo thiab koj raws li Vajtsv Txojlus rau kev ua tshoob thiab kev plojtuag. Yog li ntawd, nyob rau xyoo 1987 peb HKM thiaj tsa tau ib pab kavxwm los sau thiab ua tiav phau *Kabtshoob Kev Ko* thiab tau tsa dua ib pab kavxwm los npaj thiab sau phau *Kev Ploj Kev Tuag* tiav rau xyoo 1992. Ob pab kavxwm no thiaj los npaj tau peb HKM phau ntawv “*Kabtshoob Kev Ko thiab Kev Ploj Kev Tuag.*”

Phau ntawv no kuj ua tau ib txojkev zoo rau peb ntau leej thiab ntau pawg ntseeg taug, tabsis peb cov xibhwb, cov txwjlaug, thiab tej pawg ntseeg yeej tseem tsis yoog tej qauv hauv phau ntawv no. Thaum los txog kev tshoob kev ko thiab kev plojtuag, peb nyias iblee tseem ua lawm nyias ib yam. Dua li ntawd, peb cov xibhwb thiab txwjlaug feem coob yog cov yeej tsis paub txog kev ua tshoobko thiab kev ua ntees plojtuag li phau ntawv no. Thaum muaj ob yam haujlwm no, peb tseem vamkhom cov laus uas txawj txog ob yam haujlwm no. Twb yog vim li no HKM lub Rooj Sablaj Txwmxyoo xyoo 2002 thiaj pomzoo kom cov tsavxwm hauv HKM tsa dua ib pab kavxwm los kho peb phau *Kabtshoob Kev Ko thiab Kev Ploj Kev Tuag.* Yog li ntawd, cov tsavxwm hauv HKM thiaj tsa tau xya leej los ua cov kavxwm rau sab *Kabtshoob Kev Ko thiab Kev Ploj Kev Tuag* li no:

Kx. Ntxoov Xeeb Yaaj – Thawj Kavxwm
Kl. Tsaav Sawm Hawj – Appointed Secretary
Dr. Tswv Txos Thoj – Active Secretary
Kl. Tsuj Yob Thoj – Tus Pab
Kl. Zaam Ntaaj Thoj – Tus Pab
Kx. Num Tuam Vaaj – Tus Pab
Kx. Xulus P. Xyooj – Tus Pab

Pab kavxwm no tau sib tham thawj zaug yog lub 1/16-17/2004 thiab zaum ob yog 5/24-26/2004 nyob hauv Thornton, Colorado. Lawv kev sib tham ob zaug no tau los kho li nram no:

Qhov ib, yog kho lossis hloov cov lus hauv phau ntawv no kom zoo thiab phim li cov lus uas siv rau kev tshoobko thiab kev plojtuag.

Qhov ob, yog muab kev ua tshoobko thiab kev plojtuag tso kom mus rawsli (order) txoj kev hais tshoob thiab kev ua ntees plojtuag.

Qhov peb, yog los rhawv thiab ntxiv tog ntxhais sab kev hais tshoob thiab ntxiv tshoobko rau pojntsuag yawmntsuag thiab pojnrauj yawmnrauj.

Qhov plaub, yog muab ntau yam los ua kevcai ntxiv rau ntu uas yog sau txog kevcai thiab ho rho ntau yam uas tsis zoo tawm hauv kev tshoobko thiab kev plojtuag. Nws tsis yoojyim muab phau *Kabtshoob Kev Ko thiab Kev Ploj Kev Tuag* no ua kevcai lijchoj vim nws hajyam yuav ua teebmeem rau peb cov xibhwb, txwjlaug, thiab pawg ntseeg.

Qhov tsib, yog muab phau ntawv no lub npe hloov ntawm “*Phau Ntawv Kabke Uas Qhia Txog Kabtshoob Kev Ko thiab Kev Ploj Kev Tuag Ntawm Cov Ntseeg Yexus*” mus ua “*Cov Ntseeg Yexus Li Kabke Ua Tshoob & Kev Plojtuag.*” Qhov uas hloov li no yog hloov kom tau lub ntsiab lus thiab lub homphiaj li hauv phau ntawv no.

Peb cov Ntseeg tau tham txog “*Cov Ntseeg Yexus Li Kabke Ua Tshoob thiab Kev Plojtuag*” no nyob rau HKM lub Rooj Sablaj Txwmxyoo xyoo 2004 nyob Seattle, WA. Lub Rooj Sablaj Txwm Xyoo xyoo ntawd tau pomzoo tsocai rau cov tsavxwm hauv HKM nrog tshuaj thiab nrog pomzoo rau kev kho phau ntawv no. Cov tsavxwm xyoo 2004 ntawd muaj li no:

Dr. Txawj Teev Vaj – Thawj Tsavxwm
Kl. Nom Yaj Muas – Tus Teevntawv
Dr. Nom Lwm Thoj – Tus Cianyiaj
Dr. Xeev Ntxawg Xoom – Tsavxwm
Dr. Nyaj Zeb Thoj – Tsavxwm
Kl. Ntxhoo Nyaj Yaaj – Tsavxwm
Kl. Nyaj Zuag Thoj – Tsavxwm
Dr. Nyiaj Vaj Vaj – Tsavxwm
Kx. Vaam Tub Hawj – Tsavxwm

Cov tsavxwm HKM tau tshuaj thiab kho ib lwm uake. Tomqab ntawd lawv tau tso rau Dr. Xeev Ntxawg koj mus kho ib lwm ua ntej koj mus luam ua phau ntawv no. Yogli ntawd, thov nquahu kom txhua pawg ntseeg yuav thiab koj phau ntawv no mus qhia cov tswvcuab kom sawvdaws koj thiab siv rawsli tau sau hauv phau ntawv no.

TXHEEJTXHEEM

Thawj Tsavxwm Cov Lus Nquahu	iii-iv
Kavxwm Cov Lus Coj	v-vi
Txheejtxheem	vii
Tshoob Rau Nkauj Xwb Nraug Xwb	9-31
Zaj Lus Qhia	11
Ua Ntej Yuav Mus Hais Tshoob	12-13
Thaum Sawvkev Mus Hais Tshoob	13-14
Thaum Txog Tom Niamtxiv Tsev	14-16
Thaum Mus Hu Kwvtij Lossis Cov Txwjlaug Tuaj Pab Hais Tshoob	16
Thaum Pib Hais Tshoob	16-18
Thaum Pub Tshoob	18-20
Yog Niamtxiv Tsis Muab Tshoob	20-21
Thaum Tau Tshoob	21-23
Thaum Xaus Tshoob	23-25
Tsa Qhua Sawvkev	26
Niamtxiv Tog Ntxhais Tso Tub Yug	26-28
Niamtxiv Tog Tub Tiam Mejkoob	28-30
Lwmyam Uas Tseemceeb	30-31
Xaus Lug	31
Kabke Ua Tshoob Rau Tus Muaj Dua Pojnim Muaj Dua Txiv Los Lawd	33-40
Tshoob Pojntsuag Yawmntsuag	35-38
Tshoob Pojnrauj Yawmnrauj	38-40
Kevcai Tswj Kabtshoob Kev Ko	41-44
Kev Ploj Kev Tuag	45-54
Lus Coj Kev Rau Kabke Pam Tuag	47-48
Thaum Muaj Ib Tug Tso Ntiajteb Tseg	49-52
Kev Uatsaug Rau Hmo Xaus	53
Lwmyam	53-54

Tshoob Rau Nkauj Xwb Nraug Xwb



ZAJ LUS QHIAS

Vim peb cov Hmoob los ntseeg Vajtsv coob zuzus lawm, thiab muaj ntau yam kevcai uas peb Hmoob ibtxwm koj thiab ua los, tabsis Vajtsv Txojlus txwv tsis pub peb ua ntxiv lawm (Chivkeeb 24:50-52; Khiavdim 20:3-6; Daniyees 3:8-18; 2 Kevcai 18:10,14; 1 Kaulethaus 6:9-10; Efexus 5:18). Qee yam kevcai uas hais no muaj nyob rau hauv kabtshoob kev ko thiab. Yog li Hauvpaus Koomhaum Hmoob Qhia Txoj Moo Zoo ntawm Cov Ntseeg Yexus thiab Kev Koomtes Qhia Txojmoo Zoo (Hmong District of The Christian and Missionary Alliance) thiaj tsa peb cov uas muaj npe raws li nram qab no los sib tham thiab tho ib txojkev rau peb cov ntseeg Yexus kev ua tshoob ua ko. Feem coob ntawm cov no puavleej yog cov uas tau kawm kev ua tshoob ua ko thiab tau ua mejkoob rau ntau rooj tshoob los lawm.

Kx. Nyaj Tswb Yaaj – Thawj Kavxwm
Kx. Txawj Teev Vaj – Tus Teevntawv
Kx. Xeev Pov Thoj – Tus Pab
Kl. Num Yig Yaaj – Tus Pab
Kl. Ntsuab Pov Vaaj – Tus Pab
Kl. Nyaj Ntaaj Hawj – Tus Pab
Kl. Xaiv Phaj Koo – Tus Pab
Kl. Nkaaj Zeb Thoj – Tus Pab
Kl. Nom Lauj Lis – Tus Pab

Peb tau pib sib tham rau hnuvntim 10 lub 3 hlis ntuj xyoo 1987, nyob rau hauv Kx. Num Tuam Vaaj tsev hauv lub nroog St. Paul, Minnesota. Rooj sablaj no tau siv sijhawm tsib hnuv thiab tau los xaus rau hnuvntim 14 ntawd.

Yog li peb yuav pib ib ntus zuzus mus rawsli txojkev txojcai uas peb Hmoob ibtxwm ua los. Yam twg uas peb tsis muab los hais rau hauv no ces yog yam uas peb cov ntseeg yuavtsum muab tso tseg mus. Yam twg peb muab sau rau hauv no los tsis tau txhais hais tias yuavtsum ua li no xwb-xwb. Tiamsis peb xam pom tias yog ua npaum li no xwb mas yeej yuav tau lawm.

I. UA NTEJ YUAV MUS HAIS TSHOOB

A. Niamtxiv

Ua ntej yuav mus hais tshoob, niamtxiv yog tus npaj thiab nrhiav txhua yam. Yog tsis muaj niamtxiv lawd, tus tub yuav tau mus thov kwvtij, lossis niamntxawm txivntxawm, niamhlob txivhlob tuaj pab sawvcev ua niam ua txiv, tiamsis tus ntawd yuavtsum yog tus ntseeg Vajtsv. Yog tus tub ntawd tsis muaj kwvtij uas ntseeg Vajtsv ces hais rau xibhwb thiab txwjlaug hauv pawgntseeg tuaj pab.

B. Mejkoob Lossis Tus Cevlus

Ua ntej yuav mus hais tshoob, yuav tau thov ib tug lossis obtug mejkoob. Mejkoob yuavtsum yog ib tug tibneeg paubtab, koj tus thiab ntseeg Vajtsv.

Kevcai thov mejkoob, yuav tau nqa ib hwj dej qabzib mus hliv rau nws haus thiab hais li no:

“Kuv tuaj no yog tuaj thov koj mus ua txivtuam mejkoob, pab koj kuv tus tub _____ (npe) mus yuav nyab, koj yeej muaj dej muaj num los thov muab tso tseg mus pab kuv.”

C. Phijlaj

Ua ntej yuav mus hais tshoob, yuav tau thov ib tug ua phijlaj (ua nraug vauv luag) tibyam nkaus. Tus uas yuav mus ua phijlaj yuavtsum yog ib tug tsis tau muaj cuab muaj yig.

Kevcai thov thiab cov lus yuav mus taij mus thov ces siv tib co uas thov mejkoob ntag. Yog tus txawj hais, siv txawv zog los tau. Tiamsis nco ntsoov qhia meej tias nws lub luag haujlwm ces yog ua phijlaj ntag.

D. Tus Ris Nra

Ua ntej yuav mus hais tshoob, yuav tau thov ib tug ua tus ris nra. Tus ris nra no yog tus hluas los tau lossis yog tus muaj cuab muaj yig lawm los kuj tau thiab.

Kevcai thov lossis cov lus thov ces ciali siv tib cov uas thov mejkoob los tau, tiamsis ncontsoov qhia meej tias nws lub luag haujlwm yog ua tus ris nra xwb.

II. THAUM SAWVKEV MUS HAIS TSHOOB

A. Rooj Ntxuag

Thaum thov tau mejkoob, phijlaj, thiab tus ris nra tuaj txhij rau hauv tsev lawd, niamtxiv yuav tau ua ib rooj ntxuag tiam lawv thiab tsa lawv sawvkev. Hliv lawv ib leeg ob khob dej thiab hais cov lus li nram no:

1. Tus sawvcev niamtxiv yuav tau hais cov lus no:

“Thov koj mog txivtuam mejkoob _____ (npe), _____ (leej txiv npe) nws txheem nws nqaj nthab nws muab nws tub nyab, nws txheem nws nqaj tse nws muab nws tub se, tsis pom qab vam dag vam zog vam koj phu txiaj phu ntsig mus ntaiv hnuv ntaiv hli mus tiv niam tiv txiv. Khob dej zoo tsis muaj cob, tus ntxuag zoo tsis muaj rau koj chob; khob dej zoo tsis muaj rau koj tsaws, tus ntxuag zoo tsis muaj rau koj khaws. Lo lus qhuav los thov koj xwb los thov koj ua siab ntev mus pab. Rauj thaiv ces yuav raug koj, tiamsis roj ntsha ces nws ua niam ua txiv ua tus ris.”

2. Cov lus cob rau tus phijlaj, ris nra thiab ntxhais ua-luag hais li no:

“Thov koj mog _____ (npe luag num), _____ (leej txiv npe) nws txheem nws nqaj

nthab nws muab nws tub nyab, nws txheem nws nqaj tsev nws muab nws tub se, tsis pom qab vam dag vam zog vam koj dag koj zog mus ua (tub luag, ris nra, nkaujnyab luag). Khob dej zoo tsis muaj cob, tus ntxuag zoo tsis muaj rau koj chob; khob dej zoo tsis muaj rau koj tsaws, tus ntxuag zoo tsis muaj rau koj khaws. Lo lus qhuav los thov koj xwb los thov koj ua siab ntev mus pab.”

3. Cov lus cob nyiajtxiag thiab khoom siv.¹

“Hais rau koj ua txivtuam mejkoob, nkawv ua niam ua txiv npaj tau \$ _____ muab rau koj coj mus siv. Yog hais tias txaus lawm los hajyam zoo, yog tsis txaus los rov los ntchi nug rau nkawv ua niam ua txiv mam tsheebseeb (npaj) los ntxiv.”

B. Lub Kaus

Pomzoo muab lub kaus, dej cawv, luamyeeb, thiab pe tso tseg lawm (HKM Rooj Sablaj Txwmxyoo 1984 nyob Covenant Heights Bible Camp, Estes Park, Colorado).

III. THAUM TXOG TOM NIAMTXIV TSEV

Thaum mus txog niamtxiv tsev lawd tus mejkoob yuav tau laub dej qabzib rau niam rau txiv (cev rau txiv ua ntej li mam cev rau niam thiab cov tij cov kwv sawvdaws). Yog cev kiag ib leeg ib hwj ces yuav tau hais kom lawv tho dej haus. Tomqab ntawd hliv ob khob dej qabzib rau leej txiv thiab pib hais cov lus no rau niam rau txiv:

¹ Cov khoom siv yog (1) dej qabzib, (2) pob mov, plaub rab diav thiab obtug qaib ntim su, thiab (3) obtug qaib ua phaj ntxuag.

“Hais rau koj ua niam ua txiv luag tias nkauj hlob tiav txuj nkauj ua nkauj niam, nraug hlob tiav ci nraug ua nraug txiv. Nkauj hlob tiav txuj nkauj yuav nrhiav txij, nkauj thiaj tsheej ib yig, nraug hlob tiav ci nraug yuav nrhiav nkawm nraug thiaj tsheej ib cuab. Niamtxiv tom ub _____ (npe) nrog rau tus tub hu ua _____ (npe) nyiam tsum koj tus ntchais _____ (npe), nws thiaj thov kom kuv ua txivtuam mejkoob koj nws tus tub tuaj yuav koj tus ntchais. Yuav tuaj nrog koj txuas neej txuas tsav tis nruab tis ze. Yuav tabkaum koj ua niam ua txiv los thov koj ua siab ntev.”

Tomqab ntawd rov hliv dej qabzib rau niam rau txiv ib leeg ob khob thiab hais cov lus nram no:

“Thov nug koj ua niam ua txiv saib koj muaj kwv muaj tij, muaj niamntxawm txivntxawm, niamhlob txivhlob, nustij nuskwv lossis cov txwjlaug no los thov koj qhia pib es pib yuav mus thov tuaj pab pib sablaj ntchi nug rau niam rau txiv. Yog tias tej tub tej ntchais mloog hais los kom pib tau neej tau tsav tau nruab tau ze. Yog tias tej tub tej ntchais ho tsis mloog hais los pib txawj tuaj pib yuav txawj rov.”

Tomqab uas tus mejkoob tog tub hais tag lawd tej zaum niamtxiv tog ntchais teb li no:

“Nej tuaj los zoo kawg, tiamsis niamtxiv ntchais hlob cev tsis hlob siab, niamtxiv tsis tau xav qua, tshav nej ntuj twg los nej ho mus.”

Yog niamtxiv hais li no ces mejkoob teb hais tias:

“Niamtxiv hais los yeej yog niamtxiv lus lauj, tiamsis thov niam thov txiv yog tseg ces yuav tsis tuaj, yog tuaj lawm yuav tsis tseg, tuaj kev nqaim yuav rov kev dav, tuaj xav kom tau neej rov xav kom tau tsav, thov niam thov txiv tso lus saib tshuav kwv tshuav tij uas ntseeg Vajtswv nyob qhov twg los yuav mus hu tuaj.”

Thaum ntawd yog niamtxiv muaj tus nruab tus ze uas niamtxiv xav kom mus caum tuaj ces niamtxiv yeej qhia ntag. Thov kom niamtxiv hu cov kwvtij uas yog cov ntseeg Vajtswv xwb. Yog tsis muaj cov kwvtij uas ntseeg Vajtswv los hu cov txwjlaug hauv pawgntseeg tuaj nrog niamtxiv sablaj.

IV. THAUM MUS HU KWVTIJ LOSSIS COV TXWJLAUG TUAJ PAB HAIS TSHOOB

Thaum tau lus ntawm niamtxiv lawm ces tus mejkoob sawvkev mus hu kwvtij/txwjlaug tuaj nrog hais tshoob. Thaum mus txog lawd, cev dej rau luag haus thiab hais li no:

“Hais rau koj ua _____ (txheebze), _____ (npe) tus tub uas hu ua _____ (npe) tuaj yuav _____ (npe) tus ntchais hu ua _____ (npe). Tsis pom qab muab zog, yog li thiaj tuaj thov koj ua _____ (txheebze) mus pab pib sablaj ntchi nug rau niam rau txiv. Yuav tabkaum koj haujlwm los thov koj mus pab pib.”

Yog luag nug tias niamtxiv puas tau tsocai kom yus tuaj ces ciali qhia ncaj nraim hais tias niamtxiv kom tuaj ntag.

V. THAUM PIB HAIS TSHOOB

A. Phaj Ntxuag

Ua ntej yuav pib hais tshoob muab qaib hau. Thaum cov kwvtij tuaj txhij lawd thiab yuav pib hais tshoob ces mejkoob thov ib lub rooj los teeb rau ntawm tag; txhoov nqaij tso rau hauv phaj thiab tso rau saum rooj. Caw leej txiv thiab cov kwvtij uas raug caw tuaj ntawd mus zaum rau ntawm rooj. Hliv dej rau lawv ibleeg ob khob thiab chob ntxuag cev rau txhua tus uas zaum ntawm rooj. Coj lawv noj ntxuag thiab haus dej iblwm ua ntej mam rov hliv dua dej iblwm ntxiv.

B. Cov Lus Hais

Tomqab uas coj sawvdaws noj ntxuag thiab haus dej lwm ob tag ces pib hais li no:

“Luag hais tias, poj ua kab yawm ua kev, poj ua tseg yawm ua cia, muaj tub yuav muab nyab, muaj ntxhais yuav qua, nkauj hlob nkauj ua nkauj niam, nraug hlob nraug ua nraug txiv, nkauj hlob tiav txuj yuav nrhiav txij thiaj tsheej ib yig, nraug hlob tiav ci yuav nrhiav nkawm thiaj tsheej ib cuab. _____(npe) tus tub nyiam tsum _____(npe) tus ntxhais uas hu ua _____(npe). Peb thiaj coj nws tuaj nrog niam txiv tom no tis tshoob tis ko tis nruab tis ze.”

“Tsis pom qab muab zog thiaj vamkhom nej cov ua niamhlob txivhlob, niamntxawm txivntxawm, nustij nuskwv, thiab kev txwj kev laus tuaj nrog niamtxiv sablaj ntchi nug rau tub rau ntxhais. Muaj tshoob los hais rau peb paub. Peb tuaj kev nqaim xav rov kev dav, tuaj xav kom tau neej rov xav kom tau tsav.”

Thaum ntawd ces lawv yuav sawv mus dua ib qho lawm thiab mus sib nug txog qhov no. Txawm licas los lawv yuav rov los teb rau yus. Tej zaum niamtxiv tog ntxhais yuav tso obtug los teb li no:

“Niamtxiv hais li no, niamtxiv tus ntxhais hlob cev tsis hlob siab,² ib pluag tshais tsis tau noj, qhovtwg los tseem tog leej niam tes xwb. Yog li niamtxiv yuav txais tsis taus nej ncej tshoob. Nej txawj tuaj los nej txawj rov.”

Tus txivtuam mejkoob yuav tau hais li no:

“Niamtxiv txawm hais li los yeej yog niamtxiv lus. Luag hais tias ib puas lag nyiaj yuav tsis tau niamtxiv lo lus nyiaj lus kub. Tabsis niamtxiv tsev nqeeb tsis yog chaw sim taws, tsev

² Loj lawm tiamsis tsis tau paub tab paub cai.

vuas tsis yog chaw sim zeb³. Sawm tsis nyog lub luag khwv lauj, tiamsis thov neb ua tiag rov qab mus ntchi nug rau niam rau txiv dua. Thov niam thov txiv txais niamtxiv tom ub tus ncej tshoob. Yog peb tseg ces peb tsis tuaj, peb tuaj lawm ces peb yuav tsis tseg.”

VI. THAUM PUB TSHOOB

Thaum niamtxiv pub tshoob rau qhua lawd mas niamtxiv yuav muaj dua ib tug los pub tshoob lossis yog obtug cev lus qub. Peb tsis pub txav lub rooj rau lwm qhov, tiamsis yog niamtxiv tus neeg uas los pub tshoob muab lub rooj txav rau lwm qhov ces tos tub tus mejkoob yuav tau txeeb rov los tso qhov qub chaw.

A. Niamtxiv Cov Lus

Niamtxiv tus pub tshoob muab ob khob dej los cev rau tog qhua tus mejkoob. Lawv yuav kom yus haus, tiamsis txhob haus. Thaum ntawd niamtxiv tog ntxhais yuav hais cov lus no:

“Tav no, hais rau qhua paub, niamtxiv tus niamtxiv ntxhais hlob cev tsis hlob siab, niamtxiv nug ntxhais lawm, ntxhais lus tsis muaj dabtsi. Hais rau qhua paub qhua txawj tuaj los txawj rov,⁴ nraugvauv hu saib nkaujnyab puas hnov.”⁵

³ Tuaj yuav pojniam tiag-tiag li, tsis yog lam tuaj thab plaub.

⁴ Niamtxiv pub tshoob lawm.

⁵ Niamtxiv qee tug mejkoob kuj nyiam hais li no, “Hais rau qhua paub, nej tuaj zawj ob hnub peb hmos, tiamsis niamtxiv txais tsis taus nej qhua ncej tshoob. Hais rau nej paub es tshav nej ntuj tsis peg, nej ziab nej nplej teg, tshav nej ntuj tsis taug, nej ziab nej nplej caug, nej tuaj kev nqaim, rov kev dav. Niamtxiv lus ces muaj li no xwb.”

B. Cov Lus Pub Tshoob

Thaum ntawd niamtxiv tus pub tshoob hliv ob khob dej cev rau qhua tus mejkoob thiab hais kom nws haus, tiamsis tsis txhob haus, tsuas muab txawb rau ntawm rooj. Qhua tus mejkoob hliv ob khob dej rau niamtxiv tus pub tshoob thiab hais kom nws ua siab ntev tos.

Tomqab ntawd qhua tus mejkoob mam rov caw cov kwvtij thiab niamhlob txivhlob, niamntxawm, txivntxawm, thiab cov kev txwjlaug rov los nyob rooj. Hliv ib leeg ob khob dej thiab yog muaj ntxuag kom lawv khaws ntxuag thiab hais cov lus no:

“Vim peb rooj tshoob, thiaj tabkaum nej ib hnuv qoob; vim peb rooj ko, thiaj tabkaum nej ib hnuv num. Hnuv qab nramntsis nej caj tshoob kev ko tuaj txog wb tej ntug zej ces wb yuav ua nej leej tub nrog to ntsej; hnuv qab nramntsis nej caj tshoob kev ko tuaj txog wb tej ntug zos ces wb yuav ua nej leej tub to nrog. Ua nej sawvdaws tsaug.”

Tomqab ntawd txiv tuam mejkoob hliv ob khob dej mus cev rau niamtxiv thiab saib niamtxiv yuav muab tus twg los ua txivtxum mejkoob. Yog niamtxiv yuav kom tus twg ua txivtxum mejkoob los niamtxiv ciali qhia rau qhua paub.

Thaum ntawd, txivtuam mejkoob yuav tau hliv ob khob dej rau txivtxum mejkoob thiab thov lub rooj. Thaum thov tau lub rooj lawd ces coj tus txivtxum mejkoob los nyob ntawm rooj thiab hliv ob khob dej cev rau txivtxum mejkoob thiab hais tias:

“Tav no, tsis tsheej tshoob los tsheej tshoob tsis tsheej ko los tsheej ko lawm ces wb haus ob khob dej no ua kwv yaig kwv luag sib tuav tes hla dej ua luag dhau zoov. Kuv tuaj los tsis paub dabtsi yuav vam koj ua kwvluag pab thiab qhia xwb.”

Tus txivtxum mejkoob teb li no:

“Txhob nyuaj siab, muaj dabtsi los wb obtug kwvluag mam sib pab kom tiav.”

C. Tus Ntxhais Ua Nkaujnyab Luag

Thaum niamtxiv muab tshoob lawd, tog vauv yuav tau rov los thov ib tug ntxhais mus ua nkaujnyab luag (niam txaisntsuab). Yuav tau siv tus ntxhais paubtab uas yog hnuvnyoog kaumyim (18) xyoo rov saum.

Tus ntxhais ua nkaujnyab luag no yuavtsum yog ib tug uas tsis tau muaj cuab muaj yig. Cov lus thov ciali siv tib cov lus uas siv thov mejkoob, tiamsis yuav tau qhia meej hais tias nws lub luag haulwm yog tus ntxhais ua nkaujnyab luag.

VII. YOG NIAMTXIV TSI MUAB TSHOOB

Yog niamtxiv tsis muab tshoob,⁶ feem ntau yog tug nustij lossis leej txiv ua tus los muab ob khob dej cev rau txivtuam mejkoob thiab hais cov lus tu moo rau qhua li no:

“Hais rau koj txivtuam mejkoob, coj lus rau niamtxiv tom ub, ntxhais los tsis mloog hais, tsis yeem ces niamtxiv yuav qua tsis tau. Tshav nej ntuj tsis peg los nej ziab nej nplej teg; tshav nej ntuj tsis taug los nej ziab nej nplej caug. Nej tuaj kev dav los rov kev nqaim. Nej txhob tu siab.”

Lossis hais li no:

“Hais rau koj txivtuam mejkoob, coj lus rau niamtxiv tom ub, tus ntxhais los tsis mloog hais ces niamtxiv yuav qua tsis tau. Tshav nej ntuj twg los nej yijmeem mus, nej tuaj kev dav los rov kev nqaim. Nej txhob tu siab.”

Thaum ntawd, tus tuam mejkoob yuav hais rau tus tu moo tshoob li no:

⁶ Muaj ib txhia yog luag tsis muab tshoob ces luag los nqa lub rooj lossis muab ib ya rooj tso rau nraum zoov.

“Tshoobko tsis yog tag rau rooj no, cuag li niamtxiv tom ub tsuas tuaj tabkaum niamtxiv tom no xwb lauj!”

VIII. THAUM TAU TSHOOB

A. Cov Lus Xeejxuum

Peb yog cov ntseeg lawd tsis xav kom muab lus xeej lus xuum koj los hais.

B. Nqi Mis Nqi Hno

Tomqab ntawd, tus txivtuam mejkoob hais cov lus no rau tus txivtxum mejkoob koj mus rau niamtxiv.

“Kwvluag, koj rov mus ntchi nug rau niam rau txiv saib, niamtxiv tus ntshais niamtxiv tu iab tu khwv, ncej qab ua tog nyob ncej npab ua tog rau ncoo thiaj lojhlob, niamtxiv nyuag nqi mis nqi hno saib niamtxiv xav sau licas los ho feeb tuaj, nraugvauv thiaj pom qab rheebeeb.”

Thaum ntawd yog niamtxiv xav yuav nqi mis nqi hno⁷ licas los niamtxiv mam hais. Tiamsis tsis tsimnyog niamtxiv sau tus ntshais nqi mis nqi hno/nqi tshoob ntau ntau, vim peb ntseeg Vajtswv thiab tseem yuav vam tus tub tus ntshais rau yav tomntej.

Tomqab ntawd, txivtuam mejkoob thov txivtxum mejkoob kom nrog niamtxiv qiv ib lub phaj los siv. Thaum tau lub phaj lawd, txivtuam mejkoob muab cov nyiaj nqi mis nqi hno tso rau lub phaj thiab muab rau txivtxum mejkoob koj mus rau niamtxiv.

⁷ Nqi tshoob lossis nqi pojniam.

C. Lwmyam Nyiajtxiag

Peb yog cov ntseeg Vajtswv thiab kev qua ntshais yog kev tsa tub ntshais mus ua neej. Rauqhov peb ua qoob los npaj tshaib tu tub tu kiv los npaj laus, peb tseem yuav vam peb tej tub tej nyab tej ntshais tej vauv hlub peb rau yav laus. Yog li ntawd, peb tsimnyog muab kev ntos cov nyiaj nram no tso tseg: (1) Nyiaj khaub tsho rau niamtxiv, (2) Nyiaj pojtsiag, (3) Nyiaj qhww niam laus hauvcaug, (4) Nyiaj ntaus nco, thiab lwmyam uas teev rau nplooj ntawv 42, tus 9.

D. Noj Haus

Txivtuam mejkoob tsaws ob khob dej rau txum mejkoob thiab hais tias:

“Kwvluag, koj mus hais rau niamtxiv saib nraugvauv tuaj yuav tau niamtxiv ib tug ntshais mus ua neej lawm saib niamtxiv yuav noj haus licas los niamtxiv ho hais tuaj.”

Ib txhia mas nyiam tso rau nraugvauv ua tus npaj rooj noj rooj haus. Muaj ib txhia ho pomzoo cia nraugvauv tib teg them, niamtxiv mam ua tus npaj rooj noj rooj haus.

E. Nyiaj Tus Mejkoob

Yog cov txwjlaug hauv pawgntseeg mus ua mejkoob/cevlus no ces tsis muaj qhov tiam mejkoob, tiamsis yog niamtxiv ho mus thov lwm tus ces niamtxiv mamli tiam mejkoob (mejzeej).⁸

Thaum no, txivtuam mejkoob tsaws ob khob dej cev rau txivtxum mejkoob thiab hais tias:

⁸ Yog tias tus txivtuam mejkoob muab \$100 rau tus txivtxum mejkoob, tus txivtxum mejkoob muab \$50 rau tus txivtuam mejkoob.

“Kwvluag, hais rau koj tias, kuv txivtuam mejkoob npab tsis ntev sia tsis taus kwvluag niaj peb ncig cev. Qhov no yog qhov nyuag nyiaj sia sev.”

Tomqab ntawd, tus txivtxum mejkoob mamli tsaws ob khob dej rau tus txivtuam mejkoob thiab hais li no:

“Kwvluag, koj npab ntev koj sia kuv niaj peb ncig cev, kuv txivtxum mejkoob npab tsis ntev kuv sia koj ib ncig cev xwb lauj! Qhov no yog qhov nyuag nyiaj sia sev.”

F. Nyiaj Txais Tw Txais Khee

Nyiaj txais tw yog nyiaj txais ceg npua thiab nyiaj txais khee yog nyiaj txais khoom phijcuam. Luag pheej muab \$20 ua nyiaj txais tw thiab \$20 ua nyiaj txais khee, tiamsis Rooj Sablaj Txwmxyoo 2004 pomzoo muab tso tseg li nqi 9 ntawm nplooj ntawv 37 hauv phau ntawv no.

G. Nyiaj Cheb Rooj

Luag ibtxwm muab \$10, tiamsis Rooj Sablaj Txwmxyoo 2004 pomzoo tso tseg lawm. Thaum hais txhua yam tiav tag lawd, yuav tau cheb rooj.

IX. THAUM XAUS TSHOOB

A. Lus Xaus Tshoob

Thaum tshoobkos thiab kev noj haus tiav tag lawm ces qhua vauv tus mejkoob yuav tau hliv ob khob dej cev rau niamtxiv tus mejkoob thiab hais li no:

“Kwvluag, luag hais tias, txog caij tuaj yuav tuaj; txog caij rov yuav rov. Thov kwvluag hais rau niamtxiv paub, nraug vauv xav mus tsev ntxov zog.”

Thaum ntawd, mejkoob tog ntxhais teb hais tias:

“Kwvluag, ua siab ntev kuv mam koj lus rau niamtxiv.”

B. Kawm Moo (Lus Cogtseg)

1. Niamtxiv Coglus

Thaum tiav txhua yam thiab yuav sawvkev, leej txiv los coglus rau nraugvauv tus mejkoob li no:

“Hais rau koj txivtuam mejkoob. Koj koj tus tub tuaj yuav kuv tus ntxhais. Koj koj lus mus hais rau niam rau txiv tom ub. Hauv hlua muab cob rau nej, qab hlua kuv ua niam ua txiv tseem tuav. Kuv ciaj toog tais tsis tau kuv thiaj muab rau nej ciaj hlau tais, kuv yias tooj hau tsis tau muab rau nej yias hlau hau. Nej koj mus txawm tsis kiab tsis kais los nej yijmeem qhuabntuas rau txojkev ua noj ua haus. Thov nej tsis txhob cem nrog neej nrog tsav. Yog hais tias muaj ib hnuv twg nej tsis hlub, nyob tsis koom tog, pw tsis koom ncoo,⁹ noj mov ntxuag kua-muag, taug kev nrog suab quaj, nce toj tsis muaj tus soj, nqis hav tsis muaj tus kav. Kuv hnov tseeb hnov tsum; muaj povthawj ob leeg peb tug lawm ces kuv yuav nrog koj txivtuam mejkoob yuav cai ntag laiv!”

2. Mejkoob Lees Lus

Qhua vauv tus mejkoob teb tias:

“Uatsaug ntau koj ua niam ua txiv. Niamtxiv tej lus ces cuaj yog kaum yog. Niamtxiv hais los yog niamtxiv tub niamtxiv ntxhais. Thov koj ua niam ua txiv ho ua ntsej hnyav mintsis thiab. Yog tias hnov tuaj nruab roob xwb los koj ho ua siab loj thiab. Yog tias hnov tuaj nruab ha lawm tiag los koj ua niam ua txiv mamli hais.”

⁹ Tsis sib nyiam, tsis sib hlub lossis tsis ua niamtxiv li lawm.

Tomqab ntawd, yawmtxiv cev dua ib khob dej rau vauv thiab hais tib yam li uas hais rau mejkoob lawd thiab. Nraug vauv teb hais tias:

“Hais rau neb ua niam ua txiv, kuv yuav tau nws, kuv yuav hlub nws thiab saib xyuas nws kom neb ua niam ua txiv tau chaw ntoj chaw thuv. Neb tsis txhob poob siab.”

C. Khoom Phijcuam

Mejkoob tog ntxhais tsaws ob khob dej rau mejkoob tog tub thiab hais li no:

“Hais rau koj ua kwvluag, niamtxiv lus hais li no, luag hais tias, qhua siv nyiaj txiag laub lug tuaj, tsiajtxhu tuaj nqha nkuaj, nyiajtxiag tuaj nqha nas, los niamtxiv ua lub neej tsis xws luag. Luag hais tias, yuav zoo los yog nraugvauv mam koj mus phim tom ub lauj.” Khoom phijcuam rau tub ntxhais tsuas muaj li no xwb:

1. _____
2. _____
3. _____

Thaum ntawd nraugvauv tus mejkoob teb hais tias:

“Kwvluag, luag niajtxhis piv txojlus tias, yuav hub tsis yuav zes, yuav nkauj nyab plaub txhais taw tes. Niamtxiv tsis ciali tseem muaj khoom phijcuam thiab. Ua niamtxiv tsaug mog. Uatsaug mog, niam thiab txiv, niam txiv nraugvauv tom ub twb tau niamtxiv tus ntxhais ces twb zoo tsis txawj tag lawm los niamtxiv tsis ciali niam txiv tseem muab nyiaj phijtsab tsoos phijcuam rau ntxhais vauv koj mus ua neej. Ua niamtxiv tsaug mog.”

X. TSA QHUA SAWVKEV

A. Mejkoob Lus Rau Niamtxiv

“Uatsaug niam thiab txiv. Txoj kab txoj ke muaj qas nco li ntawd, es peb tuaj koj koj tub koj ntxhais lawm, txawm dua koj nplooj siab nplooj ntsws los koj ua siab loj thiab. Peb koj nkawd mus lawm, hnub puav mam koj nkawd rov tuaj saib neb ua niam ua txiv dua.”

B. Tus Vauv Cov Lus Rau Niamtxiv

“Niam thiab txiv, kuv tuaj koj _____ (npe) lawm txawm dua neb nploojiab los neb ho ua siab loj thiab. Wb mus hnub puav wb mam rov tuaj saib neb dua.”

XI. NIAMTXIV TOG NTXHAIS TSO TUB YUG

Yog niamtxiv thov neeg ua mejkoob uas tsis yog cia cov txwjlaug hauv pawg ntseeg hais ces tomqab qhua rov mus tsev tag lawm, niamtxiv ua ib rooj ntxuag, rub tus mejkoob, qhua txwj qhua laus, thiab ibtsoom kwvtij neejtsa los zaum rau ntawm rooj. Hliv ib leeg ob khob dej, chob ib leeg ib daim ntxuag, thiab ua lawv tsaug.

A. Txivtxum Mejkoob

Tus sawvcev niamtxiv tog ntxhais hais li no:

“Uatsaug, txivtxum mejkoob, nws tso nws niam ntab mus tsaws tsua, tso niam mov mus ntsawj thooob.¹⁰ Nws tso ntses nuj mus raws dej, ntses niag mus tsaws ntxhee, tsis pom qab

¹⁰ Tso ntxhais mus yuav txiv lossis mus ua neej.

yuav zog thiaj thov koj tuaj ua txivtxum mej¹¹ cev lus. Tav no niam ntab tau chaw nyob niam mov tau chaw so. Ntses nuj mus tau pas ntses niag mus tau hawv. Nwg tsis muaj tus zoo ntxuag rau koj khaws tsis muaj zoo khob dej rau koj tsaws. Cuag li ua koj ib lo lus tsaug qhuav xwb. Koj muaj tub muab nyab muaj ntxhais tsaws qua, koj yeejcuam (vamkhom) tsis txog los tseg, yeejcuam txog los nws ho tuaj pab koj xiab ib tug ceg rooj.”

B. Qhua Txwj Qhua Laug

Tus sawvcev niamtxiv tog ntxhais hais li no:

“Uatsaug yawm txoov niamtxiv dablaug thiab nustij, nws tso kuv niam ntab mus tsaws tsua, tso niam mov mus ntsawj thoob. Nws tso ntses nuj mus raws dej, ntses niag mus tsaws ntxhee, tsis pom qab yuav zog thiaj thov nej tuaj nrog saib tub ntxhais kev mus ua neej thiab tuav txoj qab hluas. Tav no niam ntab tau chaw nyob niam mov tau chaw so, ntses nuj mus tau pas ntses niag mus tau hawv. Nws tsis muaj tus zoo ntxuag rau nej khaws tsis muaj zoo khob dej rau nej tsaws. Tsuas yog ua nej ib lo lus tsaug qhuav xwb. Hnub qab nram ntsis, nej muaj tub muab nyab muaj ntxhais qua, nej yeejcuam tsis txog los tseg, yeejcuam txog los nws ho tuaj pab nej xiab ib tug ceg rooj.”

C. Ibtsoom Kwvtij Neejtsa

Tus sawvcev niamtxiv tog ntxhais hais li no:

“Uatsaug ibtsoom kwvtij neejtsa. Niamtxiv hais li no. Nws tso nws niam ntab mus tsawj tsua, tso niam mov mus ntsawj thoob. Nws tso ntses nuj mus raws dej, ntses nias mus tsaws ntxhee. Vam nej sawvdaws tuaj saib tub ntxhais kev mus ua neej. Tav no niam ntab tau chaw nyob niam mov tau chaw so, ntses nuj mus tau pas ntses nias mus tau hawv. Nws tsis

¹¹ “Txivtxum mej” yog ib lo lus luv los ntawm txivtxum mejkoob.

muaj tus zoo ntxuag rau nej khaws, tsis muaj zoo khob dej rau nej tsaws. Tsuas ua nej ib lo lus tsaug qhuav xwb. Hnub qab nram ntsis, nej muaj tub muab nyab muaj ntxhais qua, nej yeejcuam tsis txog los tseg, yeejcuam txog los nws ho tuaj pab nej xiab ib tug ceg rooj.”

XII. NIAMTXIV TOG TUB TIAM MEJKOOB

Thaum coj nkaujnyab los txog tsev, niamtxiv tog tub yuav tau ua ib rooj mov los uatsaug rau tus mejkoob, tus phijlaj, niam txaisntsuaab, tus ris nra, thiab tus sawvcev niamtxiv mus nres rooj tshoob.

Thaum ua tiav rooj mov no lawd, hu lawv cov no los zaum rau ntawm rooj. Hliv lawv ib leeg ob khob dej, chob ib leeg ib tug ntxuag, thiab ua lawv tsaug.

A. Txivtuam Mejkoob

Tus sawvcev niamtxiv tog tub hais li no:

“_____ , nws tsa nws nqaj nthab nws muab nws tub nyab, nws tsa nws ncej tse nws muab nws tub se. Tsis pom qab yuav zog thiaj thov koj dag koj zog koj plhu txiaj plhu ntsig mus ntaiv hnub ntaiv hli, koj koj kev txawj kev ntse mus nplig niam nplig txiv lub siab thiaj tau nyab los txog vaj tau sev los txog tsev. Nws tsis muaj tus zoo ntxuag rau koj khaws, tsis muaj zoo khob dej rau koj tsaws. Tsuas ua koj ib lo lus tsaug qhuav xwb. Thov Vajtswv foom koobhmoov rau koj.”

B. Phijlaj

Tus sawvcev niamtxiv tog tub hais li no:

“_____ , nws tsa nws nqaj nthab nws muab nws tub nyab, nws tsa nws ncej tse nws muab nws tub se. Tsis pom qab yuav zog thiaj thov koj dag koj zog ua tub luag mus

nrhiav nyab. Hnubno tau nyab los txog vaj tau sev los txog tsev. Nws tsis muaj tus zoo ntxuag rau koj khaws, tsis muaj zoo khob dej rau koj tsaws. Tsuas ua koj ib lo lus tsaug qhuav xwb. Thov Vajtswv foom koobhmoov rau koj.”

C. Tub Ris Nra

Tus sawvcev niamtxiv tog tub hais li no:

“ _____, nws tsa nws nqaj nthab nws muab nws tub nyab, nws tsa nws ncej tse nws muab nws tub se. Tsis pom qab yuav zog thiaj thov koj dag koj zog ua tub ris nra. Yuav koj dag koj zog ris nqaj ris hno mus rau niam rau txiv tom ub tau noj mus tsau plab, niamtxiv thiaj xyivfab, tub thiaj tau nyab, los txog vaj. Koj ris dej ris ntxuag mus rau niam rau txiv tom ub haus mus puv cev, niamtxiv thiaj xyibyeem (zoo siab lossis tig tau lub siab), tub thiaj tau sev los txog tsev. Nws tsis muaj tus zoo ntxuag rau koj khaws tsis muaj zoo khob dej rau koj tsaws. Tsuas ua koj ib lo lus tsaug qhuav xwb.”

D. Ntxhais Ua Nkaujnyab Luag

Tus sawvcev niamtxiv tog tub hais li no:

“ _____, nws tsa nws nqaj nthab nws muab nws tub nyab, nws tsa nws ncej tse nws muab nws tub se. Tsis pom qab yuav zog thiaj thov koj dag koj zog mus ua luag. Koj mus ua luag, mus ua ntxuam txaj ntxuam nraug ntxuam ntab ntxuam muv, ntab tuaj los ntab tsis plev, muv tuaj los muv tsis tom. Koj mus saib kev ruajntseg tub hlob tuaj los tsis deev tub hluas tuaj los tsis tham. Thiaj tau nyab los txog vaj tau sev los txog tsev. Nws tsis muaj tus zoo ntxuag rau koj khaws, tsis muaj zoo khob dej rau koj tsaws. Tsuas ua koj ib lo lus tsaug qhuav xwb. Thov Vajtswv foom koobhmoov rau koj.”

E. Tus Nres Tshoob

Tus sawvcev niamtxiv tog tub hais li no:

“ _____, nws tsa nws nqaj nthab nws muab nws tub nyab, nws tsa nws ncej tse nws muab nws tub se. Tsis pom qab yuav zog thiaj thov koj dag koj zog ua niam ua txiv mus nres tshoob nres ko. Nra sib los koj lees nqa, nra hnyav los koj lees ris thiaj tau nyab los txog vaj tau sev los txog tsev. Nws tsis muaj tus zoo ntxuag rau koj khaws, tsis muaj zoo khob dej rau koj tsaws. Tsuas ua koj ib lo lus tsaug qhuav xwb. Thov Vajtswv foom koobhmoov rau koj.”

Thaum ua txhua tus tsaug tag lawd ces hais cov lus uatsaug xaus rau sawvdaws li no:

“Ua nej sawvdaws tsaug mog, hnub qab nram ntsis, nej muaj tub muab nyab, muaj ntxhais qua, nej yeejcuam tsis txog los tseg, yeejcuam txog los nws ho tuaj pab nej xiab ib tug ceg rooj. Thov Vajtswv foom koobhmoov rau nej.”

Thaum ntawd mejkoob mam hais tej lus uas niamtxiv tom ub hais los ntawd rau cov ua niam ua txiv thiab cov ua kwv ua tij tom no mloog. Yog muaj nyiaj thiab khoom phijcuam los mejkoob mam los plovmeej tej no rau niam rau txiv.

XIII. LWMYAM UAS TSEEMCEE

A. Npe Laus

Peb cov ntseeg uas muaj pojniam menyuam lawm tsimnyog muaj npe laus. Kev tis npe laus, siv cov tibneeg nram no tus twg tuaj tis los tau. Tiamsis yog hais tias niamtais yawmtxiv tseem nyob, xub hais rau nkawv ua ntej.

1. Niamtais yawmtxiv
2. Niamtxiv lossis kwvtij
3. Xibhwb lossis txwjlaug hauv pawg ntseeg

Thaum tis npe laus, tsis pomzoo kom muaj xeejxwm thiab siv cawv ntsim.

B. Hlabnyias

Yog niamtxiv yuav muab hlabnyias rau tej ntxhais vauv los tau, tiamsis cia ua khoom pub xwb, tsis txhob muab ua kev ua cai tiam.

C. Noobncoos

Tsis pomzoo kom cov ntseeg muaj noobncoos lawm rau qhov noobncoos muaj feem txuam kev ua dab.

XIV. XAUS LUS

Tsimnyog rau peb cov ntseeg Yexus ua tshoobko thiab lwmyam kevcai uas hais los saum no kom yoojyim. Tsuas pub ua li tus qauv uas hais hauv phau ntawv no lossis ua kom yoojyim dua no xwb.

- ❖ Txhua yam uas hais los saum no, lub Rooj Sablaj Txwmxyoo 1987 (North Platte, NE) thiab Rooj Sablaj Txwmxyoo 2004 (Seattle, WA) tau pomzoo txais yuav lawm.

**Kabke Ua Tshoob
Rau Tus Muaj
Dua Pojniam
Muaj Dua Txiv
Los Lawm**

|
|

|
|

|
|

|
|

I. TSHOOB POJNTSUAG YAWMNTSUAG

A. Qhov Chivlus

Kev ua tshoob pojntsuam yawmntsuag; yog hais txog tus yawmntsuag uas yuav pojntsuam, tus tub hluas yuav tus pojntsuam, thiab tus yawmtrauj yuav tus pojntsuam. Thaum muaj li no lawd, yuav tau siv txoj kabkev no rau kev npaj thiab mus hais tshoob.

B. Thaum Yuav Mus Hais Tshoob

Ua ntej yuav mus hais tshoob, tus tub lossis tus yuav mus yuav pojntsuam ntawd niam thiab txiv yuav tau npaj tibneeg nrog mus. Yog nws tsis muaj niam muaj txiv ces tus tub yog tus npaj tibneeg nrog nws mus, tiamsis lawv yuavtsum yog cov ntseeg Vajtswv. Yog tus tub ntawd tsis muaj kwvtij ces tus tub yuav tau hais rau xibhwb thiab txwjlaug hauv pawg ntseeg tuaj pab nws.

1. **Tus Sawvcev Ua Niam Ua Txiv** – Niamtxiv lossis tus tub yog tus npaj ib tug ua tus sawvcev nrog nws mus hais tshoob.
2. **Mejkoob/Tus Txiv Nug** – Nws los yog niamtxiv kwvtij lossis cov txwjlaug hauv pawg ntseeg yuav tau pab mus thov ib tug ua mejkoob.
3. **Roov Mov**

Thaum thov tau tus sawvcev thiab mejkoob lawd, niamtxiv lossis tus tub yuav tau npaj ib roov mov rau sawvdaws noj ua ntej sawvkev thiab hais cov lus li no:

“Thov koj koj _____ (npe) no mus nrhiav niam los yog txijnkawm. Yuav mus yuav _____ (npe) ntag. Txawm ho yuav tabkaum koj haujlwm los thov koj ua siab ntev mus pab. Cov nyiajtxiag uas yuav koj mus

siv muaj li no \$ _____. Koj yijmeem siv. Yog txaus lawm los hajyam zoo, yog tshuav qhov twg tsis txaus los rov qab hais rau peb ua niam ua txiv peb mam tsheebseeb.”

C. Thaum Hais Tshoob

1. Kev Nug

Thaum mus txog, tus mejkoob yuav tau hliv ob khob dej rau tus tswvtsab (tus kwvtij uas saib tus nyab lossis tus niam ntawd) thiab hais li no:

“Niamtxiv tom ub kom wb koj _____ (npe) tuaj nug nej tus _____ (npe) no saib koj xav tias kwvtij tus twg tuaj nrog sablaj ntxig nug los koj ho pab hu tuaj.”

2. Roov Ntxuag

Thaum sawvdaws tuaj txhij lawd, yuav tau rub ib lub roov, hliv dej thiab cev ntxuag rau lawv, muab mentsis nyiaj thiab hais li no rau cov tswvtsab:

“Hais rau nej cov ua niam ua txiv ua kwv ua tij, luag tias khuv xav los tsis khuv hais, vim txiv nraug laj qas hau tis lis ntsoov peb tis av luaj dub, thiaj tu tu niam nkauj lag siab qas lag ntuj tsig pis nrab hnuv. Vim txiv nraug laj qas hau tis lis ntsoov peb tis av luaj dag, thiaj tu tu niam nkauj lag siab qas lag ntuj ntsig pis nrab nrag.”

“Peb xav tuaj nug saib _____ (npe) puas muaj kwvtij sau lossis yuav. Yog muaj kwv theejfaj, peb txawj tuaj los txawj rov qab. Yog tsis muaj kwv theejfaj ces tu hmab los peb yuav txuas kom tau hmab. Yog muaj kwv sau lawd los peb txawj tuaj los txawj rov, yog tsis muaj kwv sau ces tu ncau los peb yuav txuas kom tau ncau.”

Thaum no, cov tswvtsab yuav mus sablaj thiab los teb li no:

“Ab! Tav no ces peb tus tub tuag pom ntxa lug. Peb kuj nug lawm thiab tsis muaj tus kwv sau li lawm. Pojntsuag qua pojntsuag cev ces nej yijmeem nug. Yog nws tsis yeem los yuav ua peb tub peb nyab ces peb yuav hlub mus. Yog nws ho yeem lawd los tu hmab nej txuas hmab tu ncau nej txuas ncau.”

Thaum ntawd, tus mejkoob yuav nug tus niam ntawd li no:

“Khuv xav los tsis khuv hais vim koj tus txiv tuag pom ntxa lug ces thiaj tuaj nug koj saib koj puas yeem peb tus tub. Yog koj yeem los peb thiaj sau mus hlub. Yog koj tsis yeem los peb yuav tsis yuam. Thov koj ho teb ib lo rau peb paub.”

Thaum no, tus niam ntawd yuav teb li no:

“Yog tias nej hlub tau tiag los yuav los yuav.”

Yog thaum tus niam yeem ces yuav tau rov mus nug tswvtsab li no:

“Peb nug nws lawm nws hais tias yog peb hlub taus tiag los nws nrog peb mus saib nej cov ua kwv ua tij yuav sau licas? Hais es peb ho ntxiv.”

Thaum ntawd, cov kwvtij yuav mus sablaj thiab rov los teb li no:

“Peb yuav sau li no \$ _____.”

3. Kev Noj Haus

Ua ib pluag mov rau tswvtsab noj. Thiab thaum coj los txog tsev lawd, yuav tau mus ua ib pluag mov zeem neejtsa.

D. Thaum Rov Los Txog Tsev

Thaum yuav tau niam los txog tsev lawd, yuav tau npaj ib pluag mov noj ua Vajtswv tsaug thiab uatsaug rau tus mejkoob, tus sawvcev ua niam ua txiv, thiab lwm tus.

II. TSHOOB POJNRAUJ YAWMNRAUJ

A. Qhov Chivlus

Kev ua tshoob pojnrauj yawmnrauj yog hais txog tus yawmnrauj yuav pojnrauj, tus yawm ntsuag yuav pojnrauj lossis tub hluas yuav pojnrauj. Thaum muaj li no lawd, yuav tau siv txoj kabkev no rau kev npaj thiab mus hais tshoob.

B. Thaum Yuav Mus Hais Tshoob

Ua ntej yuav mus hais tshoob, tus tub lossis tus yuav mus yuav pojniam ntawd niam thiab txiv yuav tau npaj tibneeg nrog mus. Yog nws tsis muaj niam tsis muaj txiv ces tus tub yog tus npaj tibneeg nrog nws mus, tabsis lawv yuav tsum yog cov ntseeg Vajtswv. Yog tus tub ntawd tsis muaj kwvtij ces tus tub yuav tau hais rau xibhwb thiab txwjlaug hauv pawg ntseeg tuaj pab nws.

1. **Tus Sawvcev Ua Niam Ua Txiv** – Niam txiv lossis tus tub yog tus npaj ib tug ua tus sawvcev nrog nws mus hais tshoob.
2. **Mejkoob/Tus Txiv Nug** – Nws los yog niamtxiv kwvtij lossis cov txwjlaug hauv pawg ntseeg yuav tau pab mus thov ib tug ua mejkoob.
3. **Roov Mov** – Thaum thov tau tus sawvcev thiab mejkoob lawd, niamtxiv lossis tus tub yuav tau npaj ib roov mov rau sawvdaws noj ua ntej sawvkev thiab hais cov lus li no:

“Thov koj koj tus tub _____ (npe) no mus nrhiav niam los yog txijnkawm. Yuav mus yuav tus ntxhais _____ (npe). Txawm ho yuav tabkaum koj dejnum los thov koj ua siab ntev mus pab. Cov nyiajtxiag uas yuav koj mus siv muaj li no \$ _____. Koj yijmeem siv. Yog txaus lawm los hajyam zoo, yog tshuav qhov twg tsis txaus los rov qab hais rau peb ua niam ua txiv peb mam tsheebseeb.”

C. Thaum Hais Tshoob

1. Kev Nug

Thaum mus txog, tus mejkoob yuav tau hliv ob khob dej rau niamtxiv, niamhlob txivhlob, niamntxawm txivntxawm lossis tus uas saib xyuas nws, thiab hais li no:

“Niamtxiv tom ub kom wb koj tus tub _____ (npe) tuaj nug nej tus ntxhais _____ (npe) no saib koj xav tias yuav hu kwvtij tus twg tuaj nrog sablaj ntxig nug los ho thov koj pab hu tuaj.”

2. Rooj Ntxuag

Thaum sawvdaws tuaj txhij lawd, yuav tau rub ib lub rooj, laub dej thiab cev ntxuag, thiab muab mentsis nyiaj rau niamtxiv lossis kev txwj kev laug thov lawv nug tus ntxhais li no:

“Hais rau nej cov ua niam ua txiv ua kwv ua tij, peb xav koj tus tub _____ (npe) no tuaj yuav nej tus ntxhais _____ (npe). Thov nug nej ua niam ua txiv lossis ua neej ua tsav saib nej tus ntxhais thiab nej tus vauv tej tw xaiv tw lus puas tshuav dabtsi lawm? Yog hais tias tsis muaj dabtsi lawd, peb tuaj no yog tuaj nrog nej tis ruab tis ze.”

Thaum no, niamtxiv thiab cov neejtsa yuav mus sablaj thiab tus cev lus yuav los teb li no:

“Ntawm peb tus tub tus ntxhais ces plaub ntug yeej dawbhuv lawm. Yog muaj leejtwg ntshaw raug nyiam tsum los peb yeej qua tau.”

Thaum ntawd, tus mejkoob yuav thov cov ua niam ua txiv pab nug tus ntxhais saib nws puas yeem yuav tus tub. Thaum no, cov neejtsa yuav mus nug tus ntxhais thiab tus cev lus yuav los teb li no:

“Yog nej tus tub ntshaw raug nyiam tsum thiab hlub taus tiag los peb tus ntxhais tsis muaj lus dabtsi. Peb ua niam ua txiv los pomzoo.”

Thaum niamtxiv los teb li ntawd lawd, tus mejkoob hliv ob khob dej rau tus cev lus thiab nug li no:

“Yog niamtxiv thiab tus ntxhais tsis muaj lus dabtsi lawd, thov nug saib niamtxiv yuav noj haus thiab sau licas?”

Thaum ntawd, tus cev lus yuav rov mus nrog niamtxiv sablaj thiab los teb li no:

“Niamtxiv tub ntxhais rhais ib ruam rov qab los lawm, niamtxiv yuav xav sau li no \$ _____. Kev noj haus nyob ntawm vauv npaj tau licas los noj li ntawd.”

D. Thaum Rov Los Txog Tsev

Thaum yuav tau niam los txog tsev lawd, yuav tau npaj ib pluag mov noj ua Vajtswv tsaug thiab uatsaug rau tus mejkoob, tus sawvcev ua niam ua txiv, thiab lwm tus.

KEVCAI TSWJ KABTSHOOB KEV KO

1. Kev sib yuav ua txij ua nkawm, qhov zoo yog mus hais hauv tsev, tsis simnyog yuav zij lossis yaum mus ntsiag to rau qhov Vajtswv Txojlus qhia tias yuavtsum hwm niam hwm txiv. Yog tej menyuum sib nyiam lawd, tsis tsimnyog tej niam tej txiv yuav txwv. Yog tej menyuum tsis yeem lawd, niamtxiv tsis txhob yuam (Efexus 6:1-4).
2. Kev hais tshoob muaj mejkoob lossis tsis siv mejkoob ces siv txwjlaug. Tus mejkoob yuavtsum yog ib tug ntseeg uas paub qab hau. Qhov zoo tsis txhob cia tus xibhwb los yog tus thawj txwjlaug hauv pawg ntseeg mus ua mejkoob. Xibhwb ua tus nrog sablaj thiab pab nrhiav mejkoob los tau. Yog thaum tsis muaj tus ua tau lawd, thawj txwjlaug mus ua mejkoob los tau.
3. Txwv tsis pub coj lub kaus mus hais tshoob lawm (Rooj Sablaj Txwmxxyoo 1984 nyob Covenant Heights Bible Camp, Estes Park, Colorado).
4. Txwv tsis pub pe, siv cawv thiab luamyeeb los rau hauv rooj tshoob. Pomzoo cia muaj dej qabzib thiab phaj ntxuag xwb.
5. Txwv tsis pub ua xeejxwm loj-loj rau thaum tsa qhua vauv sawvkev.
6. Tsis pub muaj kev sib tib li ibtxwm pheed muaj los. Yog tej tub ntxhais hais meej lawm hais tias tsis yeem, yuav tau tso tseg tsis pub thov kom tib los yog liam cai kom tib.
7. Peb yog cov ntseeg lawm, yuavtsum zamtxim xwb, tsis pub nplua (Mathais 18:21-22).
8. Cov ntseeg tsis pub muaj ncauj ntsiag (ntaus nyuj) (Rooj Sablaaj Txwmxxyoo 1997 nyob Maranatha Bible Camp, Nebraska).

9. Kev qua ntxhais yog kev tsa tub ntxhais mus ua neej. Rau qhov peb ua qoob los npaj tshaib tu tub tu kiv los npaj laus, peb tseem yuav vam peb tej tub tej nyab tej ntxhais tej vauv hlub peb rau yav laus. Yog li ntawd, peb tsimnyog muab kev ntos cov nyiaj nram no tso tseg: (1) nyiaj ntuas ntxhais, (2) nyiaj muag kev txhaum, (3) nyiaj khaub tsho rau niamtxiv, (4) nyiaj pojtsiag, (5) nyiaj niamhlob txivhlob, (6) nyiaj niamntxawm txivntawm, (7) Nyiaj nustij nuskwv, (8) nyiaj qhwv niam laus hauvcaug, (9) nyiaj ntaus nco, (10) nyiaj tuam choj tshiab, (11) nyiaj fi-xov, (12) nyiaj txais ncej tshoob, (13) nyiaj txais tw txais kee, (14) nyiaj kev txwj kev laus, (15) nyiaj khaib nom khaib tswv, (16) nyiaj cheb rooj, thiab lwmyam nyiaj (tshwj nqi mis nqi hno thiab noj haus).
10. Txhua nkawm niamtxiv uas tus xibhwb los yog pawg ntseeg yuav ua tau kevcai txis yuavtsum yog nkawm uas muaj hnuvnyoog raws li nomtswv txojcai thiab xub tau ntawv tso cai ntawm nomtswv lawm xwb. Tej tub ntxhais hnuvnyoog tsis tau txog li nomtswv kevcai, niamtxiv yuavtsum tsis txhob qua. Yog niamtxiv pomzoo qua thiab tub ntxhais yeem lawm los nyob ntawm niamtxiv, tiamsis txwv tsis pub hu tus xibhwb mus koom thiab ua kevcai txis.
11. Nkawm niamtxiv uas xibhwb yuav ua kevcai sib txis hauv tuamtsev rau yuavtsum yog nkawm uas zoo li nram no:
 - a. Nkawd ob leeg puavleej muaj hnuvnyoog raws txoj cai.
 - b. Nkawd ob leeg puavleej ntseeg Vajtswv.
 - c. Nkawd thov tau ntawv sib yuav ntawm nomtswv lawm.
 - d. Nkawd rooj tshoob yog tuaj hais hauv tsev.
 - e. Thaum pub tshoob lawd, nraugvauv tsis tau coj nkaujnyab mus tsev.
 - f. Tus tub tsis tau nrauj dua pojniam thiab tus ntxhais tsis tau nrauj dua txiv, txawm nrauj los nws tsis yog tus txhaum.
 - g. Tus yawmntsuag uas yuav pojntsuam, tus yawmntsuag uas yuav ntxhais hluas, tus tub hluas uas yuav tus pojntsuam, tus yawmntsuag uas yuav tus pojnrauj uas

tsis txhaum,¹² tus yawmnrauj uas tsis txhaum yuav tus pojnrauj uas tsis txhaum, thiab tus tub hluas uas yuav tus pojnrauj uas tsis txhaum, tiamsis lawv yuavtsum mus hais hauv tsev.

- h. Nkawm niamtxiv twg uas tsis tau ntseeg Vajtswv, tiamsis nkawd ciali lees los ntseeg thiab txais yuav Tswv Yexus tim ntsej tim muag ntawm tus xibhwb uas yuav ua kevcai rau nkawd.
12. Nkawm niamtxiv uas xibhwb yuav tsis ua kevcai txis tshoob rau hauv chav pehawm yog nkawm uas zoo li no:
- a. Twb xub nyob uake li niamtxiv lawm.
 - b. Tus tub uas twb tham lwm tus ntxhais muaj menyuam lawm lossis tus ntxhais uas twb xeeb menyuam uantej yuav txiv.
 - c. Tsis tau ntaub ntawv sis yuav ntawm nomtswv.
 - d. Tus yawmnrauj lossis pojnrauj uas yog tus txhaum.
13. Yog nkawm niamtxiv uas twb sib yuav ua ntej lawd tuaj thov xibhwb suam nkawd daim ntawv sib yuav, xibhwb muaj cai suam, tiamsis yuav tau ua li no:
- a. Siv sijhawm qhuabntuas nkawd txog kev ua txijnkawm.
 - b. Muab nkawd sib txis li txojcai ntawm lub xeev.
 - c. Nkawd yuav tau coj tibneeg tuaj lossis xibhwb yuav tau hais cov txwjlaug nrog ua timkhawv txog nkawd kev sib yuav.
14. Yog obtug uas tsis tau ntseeg Vajtswv tuaj thov xibhwb suam nkawd daim ntawv sib yuav, xibhwb muaj cai suam, tiamsis yuav tau ua li no:
- a. Siv sijhawm qhuabntuas nkawd txog kev ua txijnkawm.
 - b. Qhia Vajtswv rau nkawd.
 - c. Muab nkawd sib txis li txojcai ntawm lub xeev.

¹² “Tus tsis txhaum” yog tus uas nws tus pojniam lossis tus txiv mus ua kev nkauj kev nraug thiab sib nrauj lawm.

d. Nkawd yuav tau coj tibneeg tuaj ua timkhawv txog nkawd kev sib yuav.

- 15. Xibhwb yuav tsis ua kevcai sib txis rau tus txivneej uas yuav txivneej thiab tus pojniam uas yuav pojniam. Pawg ntseeg yuav qhib tsis tau lub tuamtsev rau cov zoo li no siv.
- 16. Tsis tsimnyog rau cov ntseeg muab lawv tej tub tej ntxhais qua rau sab nraud uas tsis tau ntseeg Vajtswv, tshwj tej tub tej ntxhais lawv caum lawv lawm (Mathais 18:6; 2 Kauleethaus 6:14).
- 17. Yog ib tug ntseeg twg mus yuav cov sab nraud uas tsis tau ntseeg Vajtswv, lossis ib tug sab nraud uas tsis tau ntseeg tuaj yuav tus uas ntseeg, kev taug muaj li no:
 - a. Cov thawjcoj hauv pawg ntseeg mus ua tsis tau mejkoob.
 - b. Xibhwb ua tsis tau kevcai txis tshoob. Xibhwb tsuas mus thov tau Vajtswv rau nkawd thaum los txog tsev yog tias nkawd muaj hnuvnyoog li nomtswv txojcai.
 - c. Xibhwb suam npe tau rau nkawd daim ntawv sib yuav, tiamsis yuav tau coj rawsli nqi 13 uas hais los saum no lawm.
 - d. Cov ntseeg mus koom noj haus los tau.

Kev Ploj

Kev Tuag



LUS COJ KEV RAU KABKE PAM TUAG

Yeej tsis muaj leejtwg xav hnov thiab xav ntsib txojkev ploj kev tuag. Tej laus ibtxwm hais tias, “Ua neej nyob xav muaj tsis xav pluag, xav ciaj tsis xav tuag.” Vim peb pogkoob yawgkoob Adas thiab Evas tsis noj lus tsis mloog hais, peb sawvdaws thiaj ntsib txojkev ploj kev tuag.

Tsis muaj ib lub sijhawm twg uas cov ntseeg yuav siv xibhwb mus pab lawv npaum li thaum muaj ib tug ntseeg tag simneej. Tsev tibneeg twg ntsib kev ploj kev tuag, kev quaj kev ntsuag, tsev tibneeg ntawd yeej yuav tos ntsoov hais tias xibhwb thiab cov ntseeg yuav mus nrog lawv hlub, pab nplig thiab pab lawv tauv lawv lub kua-muag. Lub sijhawm no yog lub sijhawm uas tsev xyomcuab yuav tig thiab qhib lawv lub siab ntsws los txais Vajtswv txojkev hlub thiab kev nplig siab uas xibhwb yuav coj mus nplig lawv. Lawv yuav nco Vajtswv thiab xibhwb txiajntsig mus ibtxhis yog lub sijhawm no.

Xibhwb yuav tau mob siab thiab ceev nrooj mus nrog tsev xyomcuab hlub thaum hnov xov tuaj txog. Xibhwb yuavtsum pab tsev xyomcuab sablaj tuav tswvyim txog kev tu thiab pab tus tuag mus rau qhov uas ua rau Vajtswv tau ntsejmuag. Xibhwb yuavtsum pab lawv los ntawm kev muab Vajtswv Txojlus mus txhawb, mus nplig thiab mus tauv lawv lub kua-muag. Xibhwb yuavtsum pab lawv kawg nws lub peevxwm, kawg nws tus zog thiab rawsli Vajtswv yuav pab nws ua tau. Xibhwb yuav tau ceebtoom rau cov ntseeg kom tuaj mus nrog hlub thiab nrog pab tsev xyomcuab li cov ntseeg ibtxwm muaj los.

Tus sawvcev xyomcuab yog tus uas nrog xibhwb khiav txij tog txij peg pab tsev xyomcuab thiab saib kom ib puas tsavyam ua tau mus rawsli tsev xyomcuab thiab xibhwb tau pomzoo ua. Vim peb txhua tus ntseeg yog Vajtswv li menyuum, thaum muaj ib tug ntseeg twg tag simneej, peb yuav tau mus pab, mus hlub, mus tu thiab mus pam tus ntawd kom tsimnyog nws yog ib tug ntseeg Vajtswv thiab yog peb ib tug txheeb tus ze, kwvtij kwvnpawg ntawm Tswv Yexus lub npe.

Qhov uas peb tu thiab pab peb tej tibneeg tuag yog qhov uas peb ntsuas tau hais tias peb vammeej licas. Tsav tibneeg twg tu thiab pam lawv tej tuag zoo, tsav tibneeg ntawd yog tsav tibneeg uas vammeej. Peb yog

cov ntseeg Yexus, tsimnyog peb tu thiab pam peb tej tuag kom zoo thiab tsimnyog.

Vajtswv kuj tau pab thiab faus Nws tej tibneeg tuag thiab. Nyob rau hauv 2 Kevcai 34:5-6, Vajtswv Txojlus hais tias, “*Tus Tswv tus tubtxib Mauxes, thiaj tuag rau hauv tebchaws Mau-am, rawsli tus Tswv tau hais tseg lawm. Tus Tswv muab Mauxes faus rau hauv ib lub hav hauv tebchaws Mau-am uas nyob ncaj lub nroog Npepe-aus, tiamsis txij thaum ntawd los txog niaj hnuvno yeej tsis muaj leejtwg paub hais tias tus Tswv muab Mauxes lub cev mus faus rau qhov twg lawm.*”

Qhov no qhia rau peb paub hais tias Vajtswv tu, pam thiab log Mauxes zoo heev rau qhov tsis muaj leejtwg paub tias Vajtswv muab Mauxes lub cev log rau lub chaw twg. Qhov uas peb tu, pam thiab log peb tej tuag zoo yog qhia hais tias peb hwm nws, hwm Vajtswv thiab saib tibneeg muaj nqis. Qhov uas peb saib tibneeg muaj nqis qhia tau rau luag tuamcuab pejkum sawvdaws hais tias peb yog ib tsav tibneeg uas vammeej. Twb yog vim li no peb Hauvpaus Koomhaum Hmoob thiajli tsim muaj phau kabke pam tuag no rau peb cov ntseeg sawvdaws coj.

Pab Kavxwm Npaj Phau Ntawv Kabke Pam Tuag

Kx. Tsaav Nyaj Kwmm – Thawj Kavxwm
Dr. Txawj Teeb Thoj – Lwm Kavxwm
Dr. Nyaj Looj Yaaj – Tus Teevntawv
Kx. Nyiaj Xyooj Yaj – Tus Pab
Kl. Xaiv Phaj Koo – Tus Pab
Kl. Num Yig Yaaj – Tus Pab
Kl. Txawj Tsaab Muas – Tus Pab

I. THAUM MUAJ IB TUG TSO NTIAJTEB TSEG

A. Kev Npaj Rau Lub Ntees

Thaum muaj ib yim tswvcuab twg muaj tus tag simneej, xibhwb thiab txwjlaug yuav tau mus nrog yim tswvcuab ntawd sablaj txog cov haujlwm nram no:

1. Lub ntees
2. Kev txhawbzog thiab kev thov Vajtswv

B. Cov Tibneeg Ua Haujlwm

Vim tes haujlwm no yog pawg ntseeg li haujlwm, pawg ntseeg yuavtsum pab nrog lis kom tiav. Lub rooj tsavxwm yuav tau los nrhiav cov tibneeg khiav haujlwm li nram no, yog hais tias xyomcuab muab tso rau pawg ntseeg lossis tsev xyomcuab uas tsis muaj kwvtij ntseeg.

1. **Xibhwb** – Nws yog tus muab kev nplig siab, lossis nrog tsev xyomcuab thov lwm tus xibhwb tuaj muab kev nplig siab rau hauv tsev txiag.
2. **Sawvcev Xyomcuab** – Nws yog tus cev lus thiab saib tej phajtshab (kev siv) nruabnrab ntawm tsev xyomcuab nrog rau tus kavxwm.
3. **Kavxwm (2 leeg)** – Obtug no yog obtug uas ua haujlwm xwsli saib kev noj haus, hu qhua, saib cov qhua uas tuaj thiab txais tshavntuj.
4. **Tshwjkab (4 leeg rov saud)** – Ua zaub thiab ua nqaij, rau zaub rau mov rau cov tibneeg tuaj tau noj.
5. **Niam ua mov (4 leeg rov saud)** – Ua mov rau cov tibneeg uas tuaj ntawd tau noj.

C. Kev Hlub

1. **Cov Yuav Hu Tuaj Pab Hlub** – yog niam txivdab, xov txivdab, muamphauj, txiv dablaug, cuas nyab, cuas ntshais, ntshais-vauv. Cov lus uas mus hu hais li no:

“Kuv tuaj hu koj, koj yog _____. Nimno peb _____ ib pas nqus tsis los, kuv tuaj hais rau koj paub es thov koj tuaj nrog peb hlub. Tiamsis peb yog cov ntseeg, thov zamtxim, peb tsis muaj qaij kaus,¹³ sawv saum thawv, ntaus nyuj, siv xyab ntawv los yog siv dej caw. Peb tsuas yog hu koj tuaj nrog peb hlub xwb. Hnub qhua txws (hnub ua ntej koj mus zais/faus) yog hnub _____. Hnub samsab (hnub zais/faus) yog hnub _____.”

Teb: *“Aub, tu siab ntau. Ua cas tsis hnov lus/xov zoo es ho yuav hnov lus/xov phem (tsis zoo). Hnubno peb _____ tuag tsis nyog ob-peb zaug, tuag tsuas tuag ib zaug xwb. Ua li es kuv mam tuaj.”*

2. **Cov Uas Raug Hu Tsuas Mus Hlub** – tsis muaj qaij kaus, tsis muaj ntaus nyuj, npua tua, los yog cawv. Tiamsis mus pab nyiajtxiag, dagzog, thiab kev noj haus.

D. Kev Cob Haujlwm

Thaum hu tau cov hauv-dej hauv-num tuaj txhij lawd, tus sawvcev xyomcuab lossis tug kavxwm yuav tau cob thiab qhia haujlwm rau lawv saib yuav npaj licas rau kev noj haus.

E. Lwm Tus Uas Yuav Tau Hu

Yuav tau hu mus qhia rau HKM thiab tej pawgntseeg uas nyob ze paub txog pawg ntseeg muaj tswvcuab tso ntiajteb tseg.

¹³ Lo lus qaij kaus, sawv saum thawv, ntaus nyuj puavleej txhais hais tias kom tuaj tua nyuj.

F. Daim Komtswj

1. **Nyob Hauv Tsev Ttxias** – Kev npaj komtswj, yuav npaj li nram no los tau:

Timsuab (Prelude)

Hunkauj (2 zaj tej)

Thov Vajtswv

Nyeem Vajluskub (Yauhas 11:25-26; Yudas 1:21; Yauj 1:21; Pajlug 23; 2 Kauleethaus 1:3-7; 2 Kauleethaus 4:17-18; Yaxayas 41:10).

Nkauj Txhawbzog

Qhia txog tus tuag lub neej (tso rau hmo qhuatxws)

Qhuabqhia

Hunkauj

Thov Vajtswv xaus

Timsuab (Postlude)

2. **Nyob Tim Chaw Samsab**

Hunkauj (ib zaj)

Nyeem Vajluskub (1 Thexalaunikes 4:13-18; Yauhas 5:25-29; 2 Kaulauxais 5:1-9; Tshwmsim 7:15-17).

Thov Vajtswv

3. **Cov Xibhwb Kev Qhuabqhia**

- a. Thawj-thawj zaj nyob rau hauv tsev txias: Siv tej nqi Vajluskub uas nyob rau hauv Chivkeeb 2:15-17 lossis Tej Lus Qhia 12:7.
- b. Hmo qhuatxws: Pajlug 6:20-23; Ntawv Nkauj 23; Henplais 9:27; Loos 13:8; Tej Lus Qhia 9:1-4, 10.
- c. Tej lub ntsiab lus uas zoo muab ua lus qhuabqhia:

Cov laus: “Khaws Koj Txiv/Niam Tej Lus”

“Koj Txiv/Niam Cov Lus Kawg”

“Koj Txiv/Niam Tus Dejsiab”

“Cov Menyuum, Mloog Kuv Tej Lus Qhia”

Cov Menyuum: “Tu Siab Uas Nrog Neb Nyob Tsis Ntev”

“Yam Kuv Ntshaw Ntawm Neb”

“Tsis Yog Tag Kuv Xwb”

“Ua Neb Tsaug Rau Txhua Yam”

“Kuv Twb Txog Tsev Lawm”

G. Txaum Yim Thiab Txais Yim

1. **Kavxwm Thiab Xyomcuab Hais:**

“Uatsaug os mog, koj tseem xav neej xav tsav xav kwv xav tij, koj tsis ciali, koj tseem nqa nyiajtxiag tuaj pab peb tsev xyomcuab tiam kev kwv kev tij kev neej kev tsav. Peb tsev xyomcuab yuav nco koj txiajntsig tshavntuj mog. Thov Vajtswv foom koobhmoov rau koj.”

2. **Tus Txais Yim Hais:**

“Tsis txhob uatsaug mog, nws qaug ib caug nws sawv tsis taus, nws qaug ib rog nws sawv tsis los. Kuv tuaj los kuv tsis muaj dabtsi, tsuas yog coj lub qhovmuag tuaj saib xwb. Txhob ua tsaug. Nkim lub tsaug os mog.”

3. **Tsis Pub Pe Thiab Xyom**

4. **Peb Cov Ntseeg Ciali Hais Lus Uatsaug Xwb**

II. KEV UATSAUG RAU HMO XAUS

Cov ntseeg tsis muaj rub lub rooj lawm, tiamsis muaj uatsaug rau hmo xaus li no.

A. Kev Uatsaug

Kev uatsaug no tsuas yog ua hauv lub samthiaj tsev txias uas yog hmo xaus ua ntej lossis tom qab xibhwb qhuabqhia. Cov uas yuav los ua tsaug muaj li no:

1. **Sawvcev Xyomcuab** – Hais lus uatsaug rau obtug kavxwm.
2. **Thawj Txwjlaug** – Hais lus sawvcev pawg ntseeg uatsaug rau kavxwm, tshwjkab, niam ua mov, cov pab dagzog, thiab kwvtij neejtsa.

B. Cob Tsev Ntsojntsuag

Kavxwm yuav tau nrog tug sawvcev xyomcuab thiab tsev tibneeg tham saib leejtwg yuav ua tus tsoimkw tsev tibneeg ntsuag ua ntej los hais qhia rau kwvtij neejtsa sawvdaws.

III. LWMYAM

A. Kev Tua Tsiaj

Lub neej tas los, yog niam tuag ces neejtsa yuam kom tubki tua tsiaj tua txhuv; yog leej txiv tuag, cov kwvtij yuam kom tubki tua tsiaj tua txhuv. Peb los ntseeg Yexus, peb tsis pub yuam lawm. Kev tua tsiaj tua txhuv yuavtsum tua kom txaus noj txaus haus los tiam qhua xwb.

Yog tus tuag tsis muaj kwvtij neejtsa los yog tubki, pawg ntseeg yuav tau npaj kom txaus noj txaus haus los tiam qhua (Kalatias 6:10).

B. Kev Tshavntuj Rau Cov Tsis Ntseeg

1. Cov ntseeg pab tshavntuj mus rau tej yim tsis ntseeg uas tau kev ploj kev tuag, yeej tsis txhaum Vajluskub (Mathais 5:43-48). Kev tshavntuj yog pab rau cov tseem ua neej nyob uas raug kev txomnyem xwb.
2. Pab dag zog rau cov tsis ntseeg los tau, tiamsis tsis txhob koom rau tej yam uas fij rau dab (Tej Lus Qhia 7:1-3).

C. Kev Pab Rau Cov Ntseeg Hmoob Uas Tsis Zwm Rau C&MA

Yog muaj ib tug Hmoob ntseeg uas tsis zwm rau C&MA thov kom peb cov tswv cuab pab thiab ua kevcai plojtuag rau, peb tej pawg ntseeg yeej pab tau.

D. Noobncoos

Tsis pub kom muaj, tsis hais cov ntseeg yuav nqa mus rau niamtais yawmtxiv tsis ntseeg los yog ntxhais vauv tsis ntseeg yuav nqa tuaj rau niamtais yawmtxiv uas ntseeg (saib ntawm nplooj ntawv 31).

❖ Txhua yam uas tau hais los saum no, Hauvpaus Koomhaum Hmoob Rooj Sablaj Txwmxyoo 1992 (Kansas City, KS), 1993 (Des Moines, IA), thiab 2004 (Seattle, WA) tau pomzoo yuav li hais los saum no lawm.